

每週經課朗誦經文(巴克禮台語漢字)2014/05/25

共同經課 - 1

使徒行傳十七章二十二節~三十一節

22 保羅倚佇亞略山中，講：「雅典人啊，我看恁凡事敬畏神明嶄然熱心。23 因為我啲行遊的時，看見恁所敬拜的，抵著一座壇，頂面寫講『未識的上帝』。恁所未識來敬拜的，我用伊來給恁講。24 彼個創造世間及其中萬物的上帝，既然是天地的主，無倚起手造的殿，25 無互人的手服事，那親像伊有所欠缺；是家己用活命、喘氣，及萬物互眾人。26 閣創造萬邦的人對一個本源，倚起佇全地面，閣給in限代先定著的時期及所倚起的地界，27 是欲互in尋上帝，豈採通揣摩來得著，其實伊離開咱逐人無遠；28 因為咱惦佇伊來活、來振動，來佇啲。親像恁中間做詩的人，有的有講：『因為咱諸個亦是伊的子類。』29 今既然是上帝的子類，就毋應該掠做上帝的本質，親像金、銀、石，人的工夫人的心事所雕琢的。30 許個毋知影的時代，上帝無窮勘，今就命令逐所在的人攏總著反悔。31 因為有定著一日，欲用伊所設立的人照公義審判天下，是對死人中互伊復活，互眾人互有憑據通信。」

共同經課 - 2

詩篇六十六篇八節~二十節

8 萬百姓啊，恁著謳咾阮的上帝，互人聽見謳咾伊的聲。9 伊互阮的生命活啲，亦無互阮的腳搖動。10 上帝啊，你曾試驗阮，鍛煉阮，親像鍛煉銀一樣。11 你互阮入羅網，用重擔下佇阮的身上。12 你互人坐車搬(pôa")過阮的頭殼；阮經過水火，總是你互阮到富有的所在。13 我欲用燒祭進入你的厝，我欲對你謝我的願，14 就是佇我患難的時我的嘴唇所講的，我的嘴所下的願。15 我欲用肥的精性的燒祭，及公羊的芳味獻互你，閣用公的牛，公的山羊來獻。（細拉）16 凡若敬畏上帝的人，恁攏著來聽！我欲講起伊為我所行的事。17 我曾用我的嘴求叫伊；用我的舌謳咾伊做高。18 我若心內注重罪惡，主的確無欲聽。19 總是上帝實在有聽見；已經俯落聽我祈禱的聲。20 上帝是應該謳咾者！伊未曾推辭我的祈禱，亦未曾互伊的慈愛離開我。

共同經課 - 3

彼得前書三章十三節~二十二節

13 恁若為著好來熱心，是誰會害恁？14 總是恁若因為義來受苦，就有福氣。莫得驚in的威風，也莫得迫腹；15 獨獨恁心內著掠基督做主尊伊做聖。見若有人問恁所向望的因由，就著不時便便，用溫柔及驚畏來分訴；16 著存無通責備的良心，才恁佇叨落一項事受誹謗，就佇彼項事會互許個誣賴恁惦佇基督的好品行的，家己受見誚。17 因為上帝的旨意若愛按呢，就恁行好來受苦，比行歹來受苦卡好。18 因為基督也一擺為著罪受苦，義的替不義的，是欲導咱到佇上帝。論肉體，就受死；論神，就得活。19 佇彼個神也曾去傳道理互監內許個神，20 就是早毋信趁的，當上帝吞悞聽候佇挪亞的日、啲備辦大船的時。入彼內面的人少少，只有八個對水得救。21 此個所關照的洗禮，今也救恁；毋是除去肉體的垃摻，就是無通責備的良心向上帝來求，是對耶穌基督的復活。22 伊已經去天裡，今佇上帝大旁；諸個天使及有權柄的，有氣力的，降服伊。

共同經課 - 4

約翰福音十四章十五節~二十一節

15 「恁若疼我，就欲守我的命令。16 我亦欲對父求，就伊欲用閣一個保惠師互恁，互伊永遠及恁住，17 就是真理的神，世間所袂接納的；因為無看見伊，閣毋識伊。獨獨恁識伊，因為伊及恁相及住，閣欲惦佇恁。18 我無欲放恁做無父的子，我來就近恁。19 猶霎仔久，世間無閣看見我，獨獨恁看見我；因為我活，恁亦活。20 彼日，恁欲知我惦佇我的父，恁惦佇我，我惦佇恁。21 有我的命令閣守伊的人，此個就是疼我；疼我的人欲得著我的父疼伊，我亦欲疼伊，閣將本身顯明佇伊。」